



Sud Bosne i Hercegovine
Суд Босне и Херцеговине

Broj: S1 3 lž 040685 21 lž
Sarajevo, 18.06.2021.godine

Sud Bosne i Hercegovine u Sarajevu, u apelacionom vijeću sastavljenom od sudija Srete Crnjaka, kao predsjednik vijeća, Zvezdane Antonović i Redžiba Begića, kao članova vijeća, odlučujući o žalbi Srđana Vukovića iz Banja Luke, ulica Mlađe Ćusića 209, izjavljenoj protiv rješenja Centralne izborne komisije Bosne i Hercegovine, broj: 06-1-07-1-247/21 od 03.06.2021.godine, o davanju saglasnosti za imenovanje članova Gradske izborne komisije Banja Luka, u nejavnoj sjednici, održanoj dana 18.06.2021. godine, donio je

R J E Š E N J E

Žalba se odbija kao neosnovana

O b r a z l o ž e n j e

Rješenjem Centralne izborne komisije Bosne i Hercegovine, broj i datum navedeni u uvodu, data je saglasnost na rješenje Skupštine grada Banja Luka broj: 07-013-133/21 od 30.03.2021.godine, 05.04.2021.godine i 06.04.2021.godine, kojim se na dužnost člana u Gradskoj izbornoj komisiji Banja Luka imenuje 1. Bojana Ajder, članica.

Žalitelj je blagovremeno uložio žalbu na navedeno rješenje navodeći da je direktno zainteresovan za ishod ovog imenovanja. Smatra da je konkursna komisija Skupštine Grada Banjaluka, nekim čudnim načinom došla do odabira kandidata koji nema iskustva u provođenju izbora, te taj izbor potvrđuju kako Skupština Grada Banja Luka, sekretarijat - stručno pravno tijelo Centralna izborna komisija BiH, te u drugom razmatranju i većina članova Centralne izborne komisije BiH svojim načinom glasanja. Navodi i da „nešto“ u ovakvom načinu provođenja postupka blago rečeno ne štima može se vidjeti i po do tada neviđenoj diskusiji članova Centralne izborne komisije BiH, potaknuti sa dva dostavljena prigovora, a po temi izbora članova lokalnih izbornih komisija, na 44. sjednici kada nisu prihvatili Odluku Skupštine Grada Banja Luka te predmet vratili predlagaču, uz zahtjev Skupštini Grada za pojašnjenje dostavljenog i dostavu dodatnog materijala. Naglašava da je samo predlagač, odnosno Skupština Grada Banja Luka mogla uputiti odgovor Centralnoj izbornoj komisiji BiH, a ne neko drugi u ime Skupštine, te da se prijedlog odgovora nije našao

niti na jednoj sjednici Skupštine Grada Banja Luka. Navodi da je Centralna izborna komisija BiH na 49.sjednici od 03.06.2021.godine odlučivala po ovom istom pitanju, te da niti jedan član Centralne izborne komisije BiH se nije javio za diskusiju pri čemu je jedan član Centralne izborne komisije BiH glasao protiv ovakvog imenovanja bez da su poznati razlozi takvog glasanja. Navodi da iz svega navedenog proizilazi da članovi Centralne izborne komisije BiH nisu imali hrabrosti izbor Skupštine Grada Banjaluka poništiti jer bi se, dovele u pitanje odluke Centralne izborne komisije BiH u nekim drugim predmetima imenovanja članova lokalnih izbornih komisija. Nadalje navodi odabrani kandidat je potvrdom Gradske izborne komisije Banja Luka na jednim izborima 2010.godine bio zamjenik člana biračkog odbora, te da je samo po okončanju procesa glasanja, i to isključivo kao pomoć u brojanju glasačkih listića, bez prava glasa i prava na odlučivanje jer je to u isključivoj nadležnosti članova biračkog odbora. Navodi i da se tri puta bezuspješno obraćao Sekretaru Skupština Grada Banja Luka da mu omogući uvid u dokumentaciju kako bi ovu tvrdnju pokušao dokazati i o istom upoznati članove Centralne izborne komisije BiH.. Navodi i da Zapisnik Konkursne komisije nije dostavljen kompletan a za pretpostaviti je da nije ni sačinjen kompletan, kako bi se iz istog nedvosmisleno mogao utvrditi postupak i namjera Konkursne komisije. Nadalje navodi da svi članovi Konkursne komisije nemaju odgovarajuće izbornu iskustvo.

U odgovoru na žalbu Centralna izborna komisija Bosne i Hercegovine je predložila da se žalba odbaci kao nedopuštena jer je podnijeta od neovlaštenog lica jer ista nije potpisana i upućena je sa email adrese srdjanvuk78@gmail.com. odnosno da se odbije kao neosnovana.

Ispitujući ožalbenu odluku u okviru žalbenih navoda, vijeće Apelacionog odjeljenja Suda BiH je odlučilo kao u izreci iz sljedećih razloga:

Žalba nije osnovana.

Uvidom u spis i dostavljenu dokumentaciju i evidencije, prema shvatanju apelacionog vijeća, CIK BiH je pravilno utvrdila da Bojana Ajder ispunjava uslove propisane odredbama Izbornog zakona Bosne i Hercegovine i Uputstvom o utvrđivanju kvalifikacija, broja, imenovanju i razrješenju i obuci članova izborne komisije osnovne izborne jedinice u Bosni i Hercegovini ("Službeni glasnik BiH", br. 29/18 i 36/19).

Odredbom člana 2.12. stav 5 Izbornog zakona Bosne i Hercegovine („Sl. glasnik BiH“, broj: 23/01,7/02, 9/02, 20/02, 4/04, 25/05, 65/05, 77/05, 11/06, 24/06, 32/07, 37/08, 32/10, 18/13, 7/14 i 31/16) je propisano da članove općinskih i gradskih izbornih komisije imenuje općinsko vijeće, odnosno skupština općine, uz saglasnost Centralne izborne komisije Bosne i Hercegovine, na osnovu javnog oglasa po proceduri koju utvrđuje Centralna izborna komisija Bosne i Hercegovine.

Istom odredbom je utvrđeno diskreciono pravo općinskih vijeća, odnosno skupština općine, kao najvišeg organa lokalne samouprave, da imenuje članove općinske/gradske izborne komisije. Centralna izborna komisija Bosne i Hercegovine, kako je propisano navedenom odredbom, daje saglasnost na akt o imenovanju. Skupština grada Banja Luka je aktom broj: 07/1-555/21 od 13.04.2021.godine,

zatražila od Centralne izborne komisije Bosne i Hercegovine saglasnost na Rješenja broj: 07-013-133/21.godine, od 31.03.2021. godine, 05.04.2021. godine i 06.04.2021. godine, kojim se Bojana Ajder imenuje na dužnost u članstvu Gradske izborne komisije Banja Luka.

U konkretnom slučaju, Centralna izborna komisija Bosne i Hercegovine je, u okviru svojih nadležnosti propisanih Izbornim zakonom Bosne i Hercegovine, utvrdila sljedeće:

- a) da je ispoštovana procedura za imenovanje člana Gradske izborne komisije Banja Luka propisana u članu 7. Uputstva o utvrđivanju kvalifikacija, broja, imenovanju i razrješenju i obuci članova izborne komisije osnovne izborne jedinice u Bosni i Hercegovini (u daljem tekstu: Uputstvo) ("Službeni glasnik BiH", broj: 29/18). i
- b) da imenovana članica ispunjava sve opće i posebne uslove propisane članom 2.2 Izbornog zakona Bosne i Hercegovine i članom 2. Uputstva.

Odredbom člana 10. stav (2) Uputstva je propisano da Centralna izborna komisija Bosne i Hercegovine daje pisanu saglasnost na odluku o imenovanju članova izborne komisije, ukoliko su ispoštovane procedure iz člana 7. ovog uputstva i ukoliko izabrani kandidati ispunjavaju propisane uslove, i tu saglasnost dostavlja nadležnom organu. Stoga je Centralna izborna komisija Bosne i Hercegovine utvrdila da je rješenje Skupštine grada Banja Luka o imenovanju člana Gradske izborne komisije Banja Luka zakonito, obzirom da imenovana članica Bojana Ajder ispunjava sve imperativne uslove propisane Izbornim zakonom Bosne i Hercegovine i Uputstvom.

Odredbom člana 5. Pravilnika o utvrđivanju kvalifikacija i postupku imenovanja članova biračkih odbora propisano je da zamjenik predsjednika, odnosno zamjenik člana biračkog odbora, učestvuje u radu biračkog odbora samo ako je predsjednik, odnosno član biračkog odbora spriječen da dođe na biračko mjesto na dan održavanja izbora ili ako moraju iz opravdanih razloga napustiti biračko mjesto u toku rada na dan održavanja izbora. Iz naprijed navedene odredbe podzakonskog akta, a imajući u vidu potvrdu o izbornom iskustvu izabrane kandidatkinje u kojoj je navedeno da je obavljala ulogu angažovanog zamjenika člana biračkog odbora, suprotno shvatanju žalitelja, proizlazi činjenica da imenovana članica gradske izborne komisije Banja Luka posjeduje traženo izbornu iskustvo.

Posebno se ističe da pored ispunjavanja posebnog uslova-iskustvo u izbornu procesu, imenovana članica Gradske izborne komisije Banja Luka, je nakon obavljanje procedure intervju sa kandidatima koji su konkurisali na navedenu poziciju, napravljena je rang lista u kojoj je Bojana Ajder rangirana na 1 mjesto sa osvojenih 149 bodova, a žalitelj Srđan Vuković na 7 mjesto sa osvojenih 112 bodova, što također opravdava pravilnost i zakonitost pobijane odluke.

Centralna izborna komisija Bosne i Hercegovine, kao organ koji daje saglasnost na pisani akt o imenovanju člana izborne komisije osnovne izborne jedinice u BiH uvijek je obavezna dati takvu saglasnost, ako u postupku utvrdi da su ispunjeni svi propisani uslovi i da su ispoštovane propisane procedure. Nedavanjem saglasnosti na akt o imenovanju Bojane Ajder bila bi u potpunosti zanemarena odluka Skupštine grada Banja Luka, kao nadležnog organa koji imenuje članove gradskih izbornih komisija, pogotovo iz razloga što imenovana ispunjava sve opće i

posebne uslove utvrđene Izbornim zakonom Bosne i Hercegovine i što su ispoštovane procedure propisane Uputstvom.

Obzirom na navedeno, po ocjeni ovog vijeća, pobijana Odluka Centralne izborne komisije BiH je pravilna i zakonita, a žalba neosnovana, pa je istu, primjenom odredaba člana 81. stav 1. Zakona o upravnim sporovima Bosne i Hercegovine (Službeni glasnik BiH, broj 19/02, 88/07, 83/08 i 74/10), valjalo odbiti.

PREDSJEDNIK VIJEĆA

Sudija

Sreto Crnjak